

# Regalo Musical Pa'bo So Padu

Diadomingo 27 april den cas di cultura - 6:00 pm - entrada gratis

UN regalo dorna cu cintanan di tur color ta warda riba nos tata di cultura Juan Chabaya "Padu" Lampe Diadomingo awor dia 27 di April den Cas di Cultura cuminsando 6'or di atardi. Cintanan simbolico di tur e colornan di alegria y harmonia den cada presentacion. Invitadonan manera Edwin Abath, Jonathan Vieira, Livio Hermans, Victor Camacho, Ebby Peterson, Mario Middendorp, Doedel Sofia, Tica Giel, Rachel Kraaijvanger, Arlene Wever-Croes y nos Padu chikito tambe ariba piano, esta, Sr. Albert Croes y hopi mas di nos dushi hendenan, cla pa canta e canticanan inmortal di Padu. Albert Croes a haya e nomber di Padu Chikito pasobra e ta toca piezanan di Padu den su forma unico cu hopi amor y cariño. Entrada ta gratis !!! Hiba boso mayornan, boso rumannan, nos hobennan y tambe nos

chikito nan pa nan tambe celebra e concierto musical aki cu Aruba completo cu hopi amor y aprecio pa nos Padu. Un comision trahando duro y den forma relampago a hinca e concierto aki den otro como muestra di amor pa Padu cu ta cumpli 94 aña Diasabra dia 26 di April, nos Rey di Aruba den cultura, y lo ofrece e regalo aki na Padu Diadomingo dia 27 cuminsando pa 6'or di atardi cu un elenco fantastico di musiconan y cantantenan profesional y amateur di nos mesun tera, cu nan bunita inspiracion den nan talentonan. Sra. Vichy Lampe, e prinses di Padu a bisa Lady Ruth tambe cu Padu mes lo ta bay t'ey presente, Dios mediante, aunke un poco delicado ainda despues di su operacion despues di su caida recientemente y ta bay segun Padu su deseo, si Padu lo sinti pa keda full e concierto of solamente un parti. No por forsa

nos dushi Padu fisicamente y pesey ta pidi tur hende pa tene cuenta cu esaki ora di cuminda y of felicita Padu, pa Padu no cansa. Dios so sa cuanto tempo mas nos lo tin Padu meymey di nos, sinta den Cas di Cultura, hunto cu su dushi pueblo. Algo historico cu abo por forma parti di dje tambe cu henter bo famia. Considera e relato aki como un invitacion personal di curason di Sra. Vivian Lampe y Victor Samuel pa bin celebra cu su kerido tata. Por yama Cas di Cultura pa mas informacion tocante carchi, pa asina sa cu tur cu bin tin un stoel pa sinta. Padu a ricibi hopi amor y cariño di su nieto Irwin y nieta Sonia, kendenan tawata na Aruba recientemente pa a pasa quality time cu nan dushi welo cu tanto nan ta stima !!!! Nan lo ta den nos pensamento nan y curason sigur durante e regalo musical aki pa Padu.